

四庫全書

史部

欽定四庫全書

史部

欽定八旗通志卷二百七

欽定四庫全書

欽定八旗通志卷二百七

人物志八十七

大臣傳七十三

漢軍正藍旗二

佟鳳彩 趙賴

甘文焜 喻成龍 甘國璧

白鍾山 李宏 李本

佟鳳彩

佟鳳彩漢軍正藍旗人初為國史院副理事官順

治元年授香河知縣三年內陞山西道御史疏言

近畿沿河州縣頻年報災皆由堤岸衝決所致宜
額設堤夫培築堅固事下部議行尋

命巡視河東鹽政七年巡按湖南明年外轉湖廣武昌道
十年調河南督糧道十四年遷廣西右布政使十
六年調江西左布政使明年擢四川巡撫疏言蜀
自張獻忠蹂躪後城邑村墟所在蕩然宜令各官
捐輸修築省會城垣並葺學宮又疏言成都舊稱
沃野千里賴都江大堰蓄洩以資灌溉因遭兵燹

壅塞日久請於近堰各州縣按糧派夫每歲農隙
時官為督率開濬疏並下部議行尋丁祖憂回京
康熙六年授貴州巡撫九年疏言天下所苦累者
驛站而險遠尤苦累者黔省層山峻嶺上而復下
下而復上故俗言地無三里平也馬走一站必蹄
癢脊爛夫抬一站必足破肩穿甚至中途倒斃司
驛者徒被叅處竟無良策前此之勉力支撐者當
軍興旁午不暇計及於民名為官應夫馬實則協

幫於閩省里甲屢奉

明詔嚴禁私派臣與督臣甘文焜再四籌酌盡除協幫驛
站之累今已歲餘民間稍有起色獨驛站萬難撐
持東往湖廣者如興隆驛清平驛平越驛新添驛
西往雲南者如查城驛安南驛新興驛普安驛相
距遠者百餘里近者亦八十餘里所經坡嶺或陡
如立壁或崎嶇盤旋人足馬蹄無不損傷應於重
安江楊老堡黃絲鋪盤江坡江西坡軟橋坡六處

各增設腰站照各驛額設馬五十匹馬夫二十五
名謹繪驛路全圖入告請

勅部詳議又疏言舊例鋪兵一名日給米一升不足飽一
口故名募罕應每勒令百姓輪當近大路者尚可
勉強應役若遠隔一二百里輒斂銀轉雇借名多
派滋擾請嗣後於日給升米外加給銀二分庶應
募弗缺而百姓亦免騷擾又疏言黔省田土或巖
畔或溪澗隨其形勢零星開挖栽

朝闕黔之初州縣衛所各官俱係隨營委署之人不諳田畝賦役隨意開報戶部見其數目參差以明季賦役全書發黔訂正因將原報多者不復更改原報少者照全書增添臣蒞黔之初見其頭緒冗雜酌訂由單規式咨明戶部並嚴飭府州縣衛所等官將由單填給花戶一以杜私派之弊一以驗全書之相符與否嗣據各屬造報有稱荒多熟少請於熟田內包納者有稱田地屬府州縣而丁差

久在衛所者有稱田地屬土司苗人向來不計畝數止照寨之大小定糧數之多寡者此多彼縮不能照則例填給蓋實徵數目與全書所載本不相符且田地名色甚多錢糧輕重不一有徵糧不徵銀田有徵銀不徵糧田徵糧則每畝自數合至數斗不等徵銀則每畝自數分至數錢不等臣現飭司府各官詳細清理若限期忙迫難免一誤再誤當俟清理完日於全書內逐一更明達部以垂永

久疏並得

旨俞允十年丁母憂十一年七月起為河南巡撫兼理河
道十二年疏言豫省平定有年百姓苦累未蘇每
歲修築黃河用夫七八千名或至萬餘名自二月
至十月俱按地畝起派似乎公矣然狡猾之徒以
自己田土飛灑於人勢豪之家以他人地畝包攬
於已甚至紳衿衙役借題優免致懦弱鄉愚愈累
愈貧每月三四兩不等方能雇夫一名及解到河

工又為積年河工夫頭百計欺壓苦不能受勢必
至於逃逃而提補又得二三兩重雇是每夫一月
已費至六七兩矣即以一歲萬夫初雇月需三四
兩而計每年費至三四十萬今莫若官雇照順治
十八年以前例每夫每月僱價二兩每歲上工九
個月每夫止用僱價一十八兩綜萬夫計之止用
一十八萬兩其每歲估夫若干需銀若干除歲徵
河銀外計通省地畝分別等則派銀足之刊明由

單內我

朝制度凡錢糧俱照萬曆年間則例此項似屬加派而派夫較之派銀所費不啻數倍曷若稍一更變每畝不過加之釐毫俾得安心農畝此歲修之議若是倘遇意外大工僱價浩繁或動何項錢糧又在臨時再行酌題者也疏下部議如所請得

旨派夫累民允宜停止若派銀雇夫仍屬累民著照順治十八年以前例支河庫銀雇給如有不敷需動別項錢

糧再行題請鳳彩又疏言均平里甲久奉

俞旨通行直省惟河南荒多熟少因循如故雖有里甲之名其實多寡不一多者每里或五六百頃少者每里止一二百頃或寥寥數頃有司止知照例編差里大則田多戶殷衆擎易舉里小則田少人稀難以成役更有官儒戶名或不入甲或入甲而不當差甚至避重就輕大里愈得便宜小里愈增苦累今莫若令州縣印官按現在征糧地畝冊如一州

縣有地一千頃原分為十里者每里均分一百頃
一里之中各分十甲每甲均分十頃遇有差徭按
里甲分當則豪強無計躲避貧弱不致偏枯矣疏
下部行又疏言豫省沿河地方雖云產柳然除隄
柳園柳外俱民間納糧地栽種以供採辦自康熙
七年以來協濟江南河工之柳已二百七十餘萬
束矣而本省歲修常需百餘萬去歲開封府屬陽
武縣之潭口寺工險事迫無柳可用將民間之桃

李杏梨等樹盡行砍伐堵塞方保無虞是修防本省河工尚且不敷難堪協運外省且豫省黃河水勢洶湧原無商旅巨艦往來不過各河口寥寥之渡船耳一遇協濟渡船不敷將小河民船從陸地挖溝引水拉至大河每隻不過裝柳二三百束然尚有船可運也今朱仙鎮市舶見封雇無已俱各畏縮不前大河又無片帆往來百姓運柳至河干者祇望洋而嘆官吏束手無策若不亟圖變通將

來必至誤運現在協濟七里溝之柳九十餘萬束而隄柳園柳官給腳價銀一分五釐民柳連運腳每束給銀四分五釐向來運本省之柳修本省之工每束尚給銀五分今遠運江南千里之外止給四分五釐小民無術飛運安得不賠累乞

勅河臣於江南僱船到豫使民止備辦柳束輓運河干嗣後就江南鄰近無河患處酌辦協濟留河南有餘不盡之柳梢以備本省河患庶百姓稍得蘓息大

工不致遲誤矣疏下九卿科道議行是年冬逆藩
吳三桂反河南為進勦通衢鳳彩嚴飭各屬凡軍
需糧草官購官運又酌分解馬解礮與出兵道路
俾遠行無滯十三年十二月以疾乞休得

旨解任調理南汝總兵周邦寧以士民籲留入告左都御
史姚文然疏言鳳彩相貌議論樸實無奇而老成
練達謹慎和平服官二十餘年皆能稱職其撫豫
數載恤民疾苦民愛而信之傳聞告病以來百姓

皇皇如失所倚恃宜令力疾視事資駕輕就熟之益

上命鳳彩仍留任十六年七月卒於官年五十有六賜祭葬如典禮謚勤僖祀河南四川貴州名宦

趙賴

趙賴漢軍正藍旗人父趙夢彩天聰八年授佐領後以監修

福陵在事勤慎予三等輕車都尉世職順治四年賴襲父

職六年以署叅領隨謙郡王瓦克達討叛鎮姜瓖
有功遇

恩詔晉一等輕車都尉又一雲騎尉康熙三年擢正藍旗
漢軍副都統十三年

命隨順承郡王勒爾錦討逆藩吳三桂擢貴州提督值貴
州湖南俱陷賊

命留駐九江就近募兵設四營將校統以防勦尋擊敗賊
衆於都昌縣之土塘山及鄱陽縣之大灣十五年

四月改授江西提督時三桂之偽將軍韓大任糾賊衆陷吉安據之簡親王喇布督師進征賴同將軍哈爾哈齊率兵攻克東關斬偽副將楊玉等進師圍城屢敗迎戰賊衆十六年三月韓大任乘夜突圍奔竄賴追之不及引軍還殲其餘黨吉安平尋遣兵勦平賊黨於泰和等縣又與副都統尼滿敗賊於大嶺斬賊五千餘復安樂縣十七年調湖南提督十八年隨簡親王敗賊於衡山縣復衡州

府旋偕副都統雅哈喇復耒陽祁陽等縣時三桂已死賊黨胡國柱吳國貴吳應麟等嫌隙漸生賴偵得其情以

聞請乘渙散之會指名招徠

上可其奏尋同將軍林興珠提督趙國祚擊敗吳國貴等賊衆復武岡州是年以大兵將進取貴州仍

命賴為貴州提督尋奉

諭詳議勦賊事宜因疏言武岡楓木嶺為入雲貴大路其

西為蓮花山東為蓼溪司崗口黃茅嶺各有小路
可通雖皆峻嶺崎嶇然彼可來我亦可往計賊僅
能當路掘濠設礮石拒守耳宜分布將士刻期並
進使逆賊不能久延喙息

上以其疏示在事大臣協謀定議以行十九年大將軍貝
子彰泰將軍蔡毓榮統師由楓木嶺進賴同總兵
趙應奎等由蓼溪司進攻克龍頭山泡洞口瓦屋
塘雲霧嶺五子坡諸賊寨賊將馬寶竄走賴遣遊擊

甘文煌追擊敗之洪江恢復黔陽縣旋由沅州趨鎮遠屢敗賊衆復黎平銅仁思州思南等府二十一年同將軍穆占敗賊將高啟隆夏國相等復平遠府大軍之自湖南進者並隨貝子彰泰與廣西四川兩路大軍會期征雲南賴奉

詔率所部留鎮貴州二十一年擢正藍旗漢軍都統二十六年以老乞休三十一年六月卒子述汴襲職

甘文焜 子國城

甘文焜其先江西豐城人後遷瀋陽父應魁從

世祖章皇帝入闕隸正藍旗漢軍官至石匣副將文焜由

兵部筆帖式累遷禮部啟心郎

聖祖仁皇帝御極改大理寺少卿康熙二年遷順天府尹

六年正月授直隸巡撫先是左都御史郝惟訥以

督撫親蒞屬邑官吏因緣派累民間奏罷巡歷例

七年六月文焜疏言巡撫不巡視屬邑則吏治民

隱無由知悉如巡撫不賢圖潤私家雖坐守一城

而苛屬擾民之事正多若更賢必自愛名節省從
役絲毫不以累人而年歲豐歉民間利病有司貪
廉悉無遁情請仍

勅令巡視但申嚴苛擾禁例則不肖之人知儆而實心任
事者得盡職守疏下部詳議部臣執郝惟訥前奏
寢其事

上曰各省遇有水旱等災督撫減省從役速行履勘庶不
至顛倒輕重且可察訪貪官蠹役重加懲治於苦累兵

民之事驗實即行更改其允文焜請著為令九月文焜
疏報履勘涿霸安祁等州大興高陽文安武清東
鹿清苑等縣田地數萬頃秋雨為災請全蠲歲賦
已徵夏稅流抵來年部議按例減免有差得

旨朕聞保定真定二府及霸易道所屬州縣被災特甚勘
報十分九分者其盡行蠲免內有已徵者流抵來年文
焜復劾昌平順義懷柔密雲交河各州縣官遲報
水災得

旨下部處分如例會總督白秉真以賑費浩繁請聽官紳
等輸納銀米文焜輸銀三千助賑議敘加銜工部
侍郎旋擢雲貴總督八年五月受事奏禁各驛站
於額設夫役外派民協助時吳三桂鎮雲南雲貴
總督駐貴陽三桂欲藉邊釁以固兵權詭報土番
康東入寇又陰趣凱里諸苗煽亂羽檄交馳以覘
文焜措置文焜料康東無能為患凱里近在肘腋
不制恐滋蔓難圖先督兵進勦擒斬無算連破賊

巢遣副將冶衷忠搜勦阿魯山陣斬賊酋阿戎餘黨悉平乃以進勦康東師期移檄雲南而三桂果以康東遠遁來告文焜尋以滇疆遼濶疏請巡視因遍歷各府州十年三月疏言滇黔山路崎嶇且多瘴癘官員卒於任者請給勘合由驛歸櫬疏下部議行七月以病求罷

上以旨慰留九月丁母憂

命在任守制十一年臻剖逆苗阿福倡亂文焜遣兵搗其

寨陣斬千餘人擒阿福誅之文焜再疏乞歸葬

許給假治喪十二年十月還貴陽任事時方

允三桂撤藩之請三桂期以十一月二十四日起行陰結

黨羽謀反先期三日戕雲南巡撫朱國治分遣逆

黨逼貴陽文焜聞變即繕疏遣族弟文烱齋馳入

告復致書川湖總督蔡毓榮趣其集兵沅州聯絡

楚黔聲援先是文焜回京治喪三桂請以總督印

交雲南巡撫署理因假訓練為名盡調督標弁兵

赴滇厚結之至是煽誘潰散莫聽文焜調遣文焜
既牒提督李本深領兵扼盤江上流以拒賊適本
深以書來覘文焜意中多遁辭文焜復為手書答
之畧曰黔省安危責在提督逆賊受

國厚恩罔思圖報乃弄兵一隅自取滅亡我輩忠孝
自矢建樹正在今日尚其同心協力手足相依萬
一不濟惟有效張巡南霽雲以身殉國斷不稍存
携貳也本深得書弗顧竟據安順府從逆貴州巡

撫曹申吉亦降賊文焜見城中將吏無一可與謀者度貴陽不能守惟鎮遠地勢險阻外可號召荆楚之兵內可抗拒滇黔之隘堵遏凶鋒力圖勦滅猶事之可為者因令妾盛氏率婦女等七人自經死即輕騎馳赴鎮遠至則守將江義亦已從逆文焜至吉祥寺江義以兵環之文焜嘆曰封疆之臣當死封疆事至此無能為矣整衣冠望

闕再拜遂自刎死年四十有二第四子國城及筆帖

式和善雅圖從死焉後數年吳逆既平貴州巡撫楊雍建疏陳文焜滇黔政績及遇賊死節事得

旨甘文焜總督雲貴供職勤勞吳逆反叛捐軀殉難忠節深為可憫下所司優恤並

允直隸巡撫于成龍請遣其長子宣化府同知國均迎櫬還京至之日

遣大臣迎奠於盧溝橋贈兵部尚書

賜祭葬如典禮謚忠果廕子國璧入監二十五年貴州巡

撫閭興邦以士民請建專祠於貴陽入奏

御書勁節二字額其祠

世宗憲皇帝時以文焜入祀昭忠祠國壁自有傳

喻成龍

喻成龍漢軍正藍旗人由廕生任安徽建德縣知
縣康熙十三年遷山西潞安府同知安徽巡撫靳
輔奏留以同知管池州府通判事十七年題補池
州府知府二十三年丁母憂服闋補江西臨江府

知府二十七年遷山東鹽運使三十年遷山東按察使三十二年擢山東布政使三十四年六月遷太常寺卿時議征噶爾丹

命協同左都御史于成龍督運中路軍糧十二月遷大理寺卿三十五年擢刑部右侍郎三十六年轉餉寧夏三十七年轉兵部督捕侍郎三十八年十一月併督捕事歸刑部以成龍為刑部額外侍郎三十九年三月

命偕尚書范承勳王鴻緒侍郎王棫田雯王紳布雅努顧
藻副都御史壽鵬督修高家堰堤工九月補左侍
郎十一月調工部十二月授安徽巡撫四十二年
擢湖廣總督四十三年疏言鎮守額兵二千一
百紅苗新增部議勻抽督撫提鎮各標兵九百合
為三千防守官兵皆係額設與其勻抽不如勻調
協汎連年更換又言紅苗歸化應將辰沅靖道移
駐鎮守增同知通判巡檢吏目等官專理苗務歸

辰沅靖道轄武職不許干預苗犯輕罪聽土官發
落命盜重案土官拏解道廳審擬五寨司土官歸
廳官管轄各員俱照邊俸陞調地方有逃盜事土
官一併議處以麻陽縣訓導移駐五寨司設義學
聽苗民肄業苗寨有仇殺者視聚衆多寡并土司
分別治罪均得

旨允行是年河工告成敕督修高家堰功加成龍五級四
十五年疏請湖廣各土司子弟有讀書能文者注

入民籍考試從之先是成龍於四十三年疏題鎮
軍鎮兵王漢傑聚眾搶掠當舖應正法餘黨不識
姓名免深究

上以王漢傑等俱係防守兵丁前後糾黨三百餘人肆行
誅掠又出城站隊逼官索結情罪可惡

諭再詳審定擬具奏至是成龍覆奏引律不合又不劾該
管官

諭曰凡管理兵丁將弁必平素約束軍伍禁令嚴明兵丁

始克遵法紀地方無事今喻成龍不將各營武弁獻審
明白輒以並不知情徇庇具題著該部嚴加議處部議
革成龍職五十二年

命復原職尋卒

甘國璧

甘國璧漢軍正藍旗人父文焜雲貴總督殉吳三
桂之難有傳康熙二十八年國璧以父廕授河南
陝州知州累遷江蘇蘇州府同知浙江寧波府知

府四十二年遷陝西甘山道丁憂回旗四十二年
補山東登萊青道五十二年擢江蘇按察使五十
三年遷山東布政使五十四年擢雲南巡撫五十
七年二月疏言鶴慶永北皆通西邊要路今備兵
防守宜多儲糧查蒙化麗江等府州縣應徵糧米
例係四年折徵一次茲屆折徵請仍徵本色十二
月疏言撤甸苗傾心歸順請移武定府同知駐撤
甸分防治理俱下部議從之五十九年五月奏雲

南迤西向未設驛今大兵出口自安寧州起至塔城止請設二十一站又疏言州縣因公挪用虧空錢糧請照霉爛倉穀例革職留任限年賠完其霉爛倉穀者不論在任解任及分賠之知府限內全完准其開復均下部議行先是都統武格將軍噶爾弼會兵進藏議糧專用川運年羨堯奏蜀糧不足兼供滇蜀兵九月國壁偕總督蔣陳錫奏撥用雲南糧

上責其不能預先料理幾至遲誤蔣陳錫甘國璧俱革職
自備資斧運米進藏雍正元年撤兵二年

命赴雲南賠補運糧倒斃牛馬並侵用銅錫等項銀八萬
十年回京十月授鑲白旗漢軍副都統十一月擢
正黃旗漢軍都統十三年五月

命隨同王大臣辦理苗疆事務未幾兵部叅奏國璧朦混
奏免西安糧道祖允焜應追軍需議降級留任

諭曰甘國璧以輓運軍需貽誤革職已成廢棄之員前歲

朕因辦理旗務一時不得其人念伊尚無貪贓劣蹟將
伊用為副都統旋授都統之職實冀其殫心供職以圖
後效乃伊狡猾性成諸事瞻徇沽譽毫無抒誠報効之
處深負朕恩著革職在都統任內効力贖罪六月疏言

八旗世襲叅佐領等官由外任襲替之人有於得
旨後即請領俸者有於到任後請領者事不畫一嗣後凡
有外任襲替者除在軍人員俱令到任後支領從
之七月

命管理八旗井田乾隆元年疏言井田各戶有緣事咨回
本旗者請停補缺將原領田房交州縣賃種部議
令國壁確查實力耕種者改為屯戶照畝輸糧其
咨回本旗者原領田房交州縣賃種國壁尋奏改
屯莊事宜一各戶給田有公有私公田糧石原係
儘收儘報今既改屯應酌定額數照畝輸糧一三
堡旗民雜處難於約束請將各戶原領房田交各
州縣即於咨回井戶所遺房地內撥給一八旗屯

戶有子者頂補無子寡婦請留地四十畝養贍卽
令本屯人代種輸糧俟伊身故將地交官一井田
原撥霸州固安永清新城四屬地今議改屯令防
禦管轄就近防禦只有二員請將近霸州者令霸
州防禦管轄近固安者令固安防禦管轄一各戶
向設鄉長一督率農務稽察奸匪請仍留供役遇
屯長缺出拔補一原設驍騎校應撤回另補但該
員回京候補并無房產請暫留種地俟補缺日令

其交地回京部議如所請十一月

命往熱河同將軍申慕德訓練兵丁三年七月授綏遠
城右翼副都統九月疏言熱河兵一千移駐歸化
城係臣帶往請十起行走從之四年奏歸化城自
移駐官兵以來生聚日繁需糧倍昔請撥存公銀
採買糧石分貯歸化綏遠托克托城三處

命交山西巡撫議行五年四月綏遠城將軍伊勒慎劾
原任將軍王常貪婪不職據國壁首其侵冒匠役

名糧應將王常交部治罪國璧雖經自首咎亦難
辭奉

旨革職十二年卒

白鍾山

白鍾山漢軍正藍旗人康熙四十七年由官學生
補戶部筆帖式雍正元年遷江南山清裏河同知
五年遷淮揚道九年遷江蘇布政使十年十一月
條奏海疆事宜一狼山鎮駐通州蘇松鎮駐崇明

距蘇州俱遠輓運不便請即於所駐及附近州縣撥給一崇明孤懸海外地不產米前撫喬世臣奏准於江廣產米處採買積貯請撥萬石貯崇明縣倉備平糶一海濱漲出沙洲民居不知防患請令地方官督於農隙築土墩高二丈以避潮至從之十二年七月授南河副總河十一月奏宿遷桃源安東三縣之夏家馬頭陳家樓王家馬頭等處應下埽加鑲資捍禦阜寧縣之辛家蕩係黃河頂衝

兼有海潮上湧應築堤保固從之十二月擢河東河道總督乾隆元年十一月奏河標兵駐濟寧每青黃不接無倉儲可資不得不稱貸貴糴迨領餉償還約糧一斗費二升之價現有河標生息銀三千七百餘兩請買穀四千石設倉存貯令城守營守備經管河標副將稽察春間糧貴借給兵丁秋收還補免加息十二月奏陳豫東河防事宜一東省管河千把總共八員河兵六百名應增河營守

備一駐要地巡防聽河道管轄一河灘土本虛鬆
漲發漫灘刷成支河黃水勢分則溜緩沙停止河
日致淤高應責成該管官於水落時堵塞支河堅
實違者叅處如武者議敘一伏秋水發搶護險工
購募夫料刻不容緩請撥河南司庫存公銀以五
千貯南岸鄭州及歸德府庫五千貯武陟封邱縣
庫撥山東司庫銀三千貯曹單縣庫動用仍按數
歸款永遠儲備均下部議行三年六月白鍾山因

本年南來糧船較遲恐回空阻凍誤冬兌議將東省本年停運及已回次船通融接運即令南船自東回次受兌免遲誤新運與山東巡撫法敏同奏

聞

上以有裨漕務從之十一月疏言河岸查出灘地葦地三十餘頃裁蘆葦備用造冊報部至運河南陽南旺獨山安山湖堤兩旁俱長雜草秋深可刈作埽心因管河文武汎員向無養廉變價資用未經歸

公請嗣後武汛備弁照標營給額定隨糧文汛州
同等官給養廉採草備公十二月疏言管河州同
等官在黃河則防守堤埽在運河則挑浚河道護
重儻空懇照江南例每員歲給銀六十兩為養廉
按季支領奏入俱報

聞四年四月疏言漳水向由直隸入海康熙四十五年
引漳入衛濟運故道漸淤全歸衛河勢難容受嗣
經山東巡撫岳濬等會勘于德州哨馬營建滾水

壩開引河洩衛水由鈎盤河達老黃河入海無如
漳衛二水挾沙帶泥隨挑隨淤多費帑金漳水舊
有正河支河應擇易浚者復其故道於館陶建閘
衛水大聽漳入海以防漲衛水小分漳入衛以濟
運奏入

敕大學士鄂爾泰詳勘議奏尋議於邱縣城東自和爾
寨村承漳河北折之勢接開十餘里至漳洞村入
舊河於所挑新河頭下東流入衛處建閘以時啟

閉

上從之八年正月調江南河道總督四月疏言石林一
工自去冬堵塞後黃河已歸正流惟南岸淤高黃
水側注北岸今北岸石林口復堵築堅固大溜必
直趨以下之黃村韓家塘等處新築子堰恐難抵
禦臣於對岸挑引河引溜南趨加厚子堰捐修堡
房派弁兵巡防十月奏言葺蕩左右兩營每年額
採柴二百二十五萬束輪流運交備料乃日久弊

生掛欠不清謹酌陳數條一官蕩民地縱橫夾雜
兵民混採難禁應查明畫界兵各分地一區使有
專責一葦柴於霜降後採取性堅經久前無定限
弁兵將堅好者盜賣臨期採青葦充數嗣後應定
限年內督兵採取十分之六來年清明前採完運
交一蕩地距黃河水次寫遠全賴溝渠深通葦柴
方可依限出筏但營弁領銀興挑敷衍塞責應委
幹員駐工監督取結驗報一向來運柴船載少致

兵丁夾帶私柴應令委員在總匯處量行加載船
不增而運可速一運柴船脫幫停泊有改柵盜賣
諸弊應照糧船例編號依幫銜尾沿河文武催償
兩奏入

上均嘉之九年六月陳奏江南河標四營請照河東例
建營倉動支閒款銀六千兩採糧過價貴時出借
兵丁疏入報

聞十年九月疏報銅沛廳屬水電山對岸沙灘逼溜南

趨河崖日坍漸近堤根正籌料加幫月堤八月中
黃河大溜忽隨風掣入新刷河漕沖去沙灘直達
尾閘水電山堤外水消挂淤堤工俱已停止節省
工料不少誠

聖德感孚河神所致

上敕白鍾山虔誠致祭以申謝忱十一年二月御史楊
開鼎劾白鍾山辦河務出納慳吝任意駁減工程
不固沿河查工有供應鋪設及家人兵役需索河

員滋怨上年陳家浦決七百餘丈止奏二十餘丈
延兩月方興工築阜寧鹽城受累請

旨嚴飭白鍾山當公忠體國痛改前非

諭曰果如所奏應重治白鍾山之罪豈但嚴飭使之改
過而已若楊開鼎或懷私妄奏或悞聽人言則亦有
應得之罪若不查勘明白無以服衆人之心將來大
臣等何以辦事著高斌帶楊開鼎前往會同尹繼善
確查具奏閏三月高斌等覆奏所叅白鍾山任意駁

減需索供應諸款俱無確據惟陳家浦漫口沖刷
與淹沒受害事屬有因致工員解體輿論不服白
鍾山不宜仍任總河

諭解任來京交部嚴加議處尋革職

命發往江南河工効力五月高斌奏埽壩規宜

上以白鍾山從前辦過工程多係不應興工處糜帑令
總河顧琮查明俱著白鍾山賠補七月

諭曰白鍾山在總河任內辦理河工種種濫用應賠帑

銀甚多查伊在京房產所值不過數千金聞其宦資
皆寄頓淮揚鹽商家代為營運朕降旨與吉慶令其
訪察今據吉慶開報已有十萬之數巧官欺人暗飽
私橐究不能不敗露也著尹繼善一一追出以補白
鍾山應賠之項十五年六月授直隸未定河道十八
年九月江南銅山縣張家馬路河溢

命白鍾山隨尚書舒赫德馳往辦理十月加按察使銜
協辦南河事務十九年授河東河道總督二十年

四月署山東巡撫二十一年三月疏言曲阜縣知縣缺向由衍聖公保舉每多瞻顧營私且邑中非其尊長即係姻婭牽制狎玩在所不免請改為在外揀選調補不必拘用孔氏族人下部議准令現任曲阜縣知縣孔傳松赴部以外省知縣另補

諭曰我國家尊崇先聖遠邁前朝廷恩後葉有加無已豈於此而有靳焉但與其循舊制而致瘵官有乖政體何如通變宜民俾吏舉其職民安其治於邑中黎

庶孔氏族人均有裨益但現任世職知縣既已謝事
若歸部銓選不過恩及其身而止於朕心猶有未愜
著加恩授為世襲六品官仍令揀選充補用副朕重
道崇儒至意十一月

上以白鍾山堵築孫家集漫口迅速完工議敘加一級
十二月奏濟寧南積水未消請緩開汶河大壩保
護縉道民田咨江南疏浚下游河道

上命白鍾山親往查辦南河文武聽調遣二十二年正

月調江南河道總督二月疏言近年有石林口漫溢張家馬路衝奪沙停河淤下流不暢漸成南高北窪之勢迨孫家集潰決河底益高

皇上軫念積水未消

敕將荆山橋上下洩水河道挑深俾水涸民得播種查黃河受病總由水勢側注北岸衝刷溝漕惟有南北分籌南宜疏而北宜築則使支河不致奪溜疏則使有餘之水勢稍分庶徐郡可期莫安河東河

臣張師載由荆山橋一路查勘於二月初至徐謹
與面商陳管見三條一南岸長灘則北岸更險必
將長灘逼溜生灣處挑成順勢其大灘橫亘則挑
引河導溜歸中兩岸堤工加高一北岸無堤漫水
有梁家馬路徐家莊等間段支河數十道又黃家
莊郭家堂諸處有溝漕漫坡矮灘宜築土壩俾水
勢平漕時收束以刷正河盛漲時平漫平消不至
沖漕奪溜並將孫家集堤工加築寬厚於河身增

土壩二三道以資重障一駱馬湖北受山東蒙陰
諸山水西受微山湖水其尾間在六塘河上游湖
堤在在殘缺應修培捍禦奏入

命分任和衷辦理

上南巡

御製詩賜之曰司河稱最久自是悉防修慎莫幸無事
勉惟建遠謀况經益新淤此實厯深憂勗爾平成績
紆予宵旰籌時工部侍郎夢麟奉

命馳勘荆山橋工程白鍾山同奏言現在丈估應挑工程自茶城至荆山橋下游王母山止河道綿長廣募夫役河員呼應不靈請

敕督撫派沿河銅豐沛蕭碭宿靈虹睢邳十州縣印官來工分三十七段領帑興修從之工竣

賜以詩曰南巡江國周遭歷不使河干負弩朝嘉爾導疏合優敘肯因小節課臣僚尋議敘加一級六月奏寧夏河水值長即飛報下游防範立法甚善正陽

關乃淮水上下關鍵請於大汛時委佐襟在彼查
報並

敕兩江總督河南安徽巡撫令沿河州縣照寧夏水報
例實力辦理

詔如所請八月尹繼善奏湖口閘應增滾壩咨商白鍾
山等籌辦

上慮往返耽延有妨工作

敕令白鍾山與步麟尹繼善等分任責成同時並舉均

於歲內告成以收實效十一月疏言上江諸水開
放後皆歸安河達洪澤湖安河間段淤淺連年水
患皆由此現募漁船四五百伐蘆撈泥俾尾閘一
通上游皆有去路又勘歸仁堤下舊有涵洞穿入
鮑家河達安河年久湮塞今擬開浚分林子河一
支則安河進水之地亦有所分河患可漸減奏入
報

聞十二月疏言葦蕩營設浚船柳船石船運料定例三

年小修五年大修八年拆造但未定修造時限未
免遲延嗣後石船大修拆造定限四個月小修三
個月浚船柳船大修拆造定限三個月小修兩個
月派守備承修叅將督修逾限議處未屆修期損
壞照例分賠從之是月各工告竣議敘加一級二
十三年加太子少保二十六年乞休

上慰留之尋卒

詔贈太子太保

賜祭葬如例諡莊恪

李宏

李宏漢軍正藍旗人由監生捐州同河工効力授
山陽縣外河縣丞乾隆元年授揚州府揚河通判
四年遷淮安府山安同知十二年丁母憂服闋補
徐州府宿虹同知十六年擢河庫道十八年八月
欽差尚書劉統勳等疏叅江南河員虧帑一案解宏任
十一月查明本任無虧奏留工効力二十二年二

月

命發往直隸以河務同知用四月兩江總督尹繼善奏

留南河尋隨

欽差侍郎夢麟辦六塘河以下宣洩積潦事宜七月補

河庫道十月丁父憂

命在任守制二十七年調淮徐道二十九年六月擢河

東河南總督九月奏言山東運河源出汶水每遇

不足全資湖水接濟各水櫃貯蓄於秋冬灌輸於

春夏所關甚鉅今秋雨較少湖水不宜多洩現飭
早閉臨運各閘十月又言微山湖為山東江南二
省濟運之要需蓄水最宜充盈韓莊湖口閘水現
深一丈與滾水壩脊相平回空船足敷浮送即飭
下板堵閉又泗河源出泗水縣陪尾山諸泉彙合
秋冬之際與其收入獨山湖僅濟南陽以南之運
不若收入馬場湖俾濟寧上下河道並資其益臣
現將兗州府城東京口壩築土堰攔截俾泗水由

黑風洞入府河合泲水以達馬場湖廣為儲蓄南
運更屬有備至專濟北運之蜀山馬踏二湖水勢
較上年差弱雖冬間煞壩挑河尚有汾水分入但
春間必須趕築大壩多收方於北運有裨

諭曰東省運河全賴各湖水櫃收蓄充盈以濟來春重
運今既水勢微弱自應早為經理籌辦著派淮徐河
道李清時前往山東會同總河李宏巡撫崔應階妥
協商辦十一月奏言今歲伏秋汛內南旺湖之北沙

趙漳衛等河其南汶泗韓馬等河多淤衛河係下
河廳屬照例用船撈濟運上二廳屬之南旺濟寧
臨清三處塘河及各汎長河有額募二項人夫挑
濟捕河廳屬額夫足用其募夫工價銀全省惟加
河廳屬因彭口山河之水挾泥沙而來多停積且
入閘內水落灘現額夫不敷辦理應將補河省項
移此增募攢辦期寬深濟運報

聞又奏黃河北岸之耿家寨埽工為豫東第一險要自

乾隆九年下埽修防歲費帑料盈萬伏秋屢經搶
護去冬於對河灘挑引渠莫分溜勢仰賴

聖主鴻庥今秋全河大溜暢分入渠衝刷寬深險工淤
閉以二十載鑲修之工一旦化險為平得

旨嘉獎交部議敘加一級三十年正月

上南巡過山東宏迎

駕

御製詩賜之曰南河久董役北省特掄英試小將投大

惟明更要誠固隄綏禹甸輸漕達燕京咨度久安計
寧徒扈蹕行三月調江南河道總督

諭曰李宏甫由監司擢用總河現在所屬道廳多係舊
時同寅恐難免有瞻徇掣肘之處著高晉統理南河
事務李清時向任東省熟於運河事務而黃河隄岸
機宜尚恐未能深悉此時河東總河仍著李宏協理
李清時速即同往豫省講習河防諸務俟伏秋汛過
李宏再赴南河新任七月疏言黃河至河南陝州峭

壁橫向水從石出名曰三門寬不過七八十丈至孟縣兩岸漸無山岡始濶十餘里北岸武陟縣南岸滎澤縣始有隄工防衛丹沁兩河由武陟木欒店匯入伊洛瀍澗四河由鞏縣洛口匯入遇雨多水發挾沙而行勢遂浩瀚是以上南河廳屬之胡家屯楊橋等處首櫻其鋒工最緊要迤下順軌東流惟土性浮鬆逢灣掃刷倘黃與沁洛並漲兩岸節節須防乾隆二十六年秋汛時沁洛長一二丈

而寧夏迭報河水長丈餘一時並下故處處受險
若先後長落則大河儘可容納工易防修即如本
年夏間伊洛並未長惟寧夏水長五尺二寸陝州
城外萬錦灘亦長三尺五寸而下游各廳僅報數
寸至尺餘不等道遠流微又有三門關鎖水勢滲
減工程鞏固此其明驗上游長落大小關工程平
險不可不留心防衛臣思三門為黃河出水要區
鞏縣城北洛口為伊洛瀍澗入河總匯現咨河南

撫臣飭陝州鞏縣各立水誌每年自桃汛起霜降
止水勢長落尺寸逐日登記據實具報至沁水飭
黃沁同知於木欒店龍王廟前另立水誌查報遇
陡漲照寧夏例飛報江南總河關會上下河員相
機修防實於工程有益又濟瀆出河南濟源縣西
北三里濟瀆廟後滙潁河由孟縣迤東達黃河岸
高河底無衝溢患又大丹河出山西高平縣至河
內縣之丹谷口築攔河碎石壩遏令由小丹河歸

衛濟運壩下設堰九分十九渠石隙洩下之水聽
民灌田名九道堰漕民並賴前經河臣張師載奏
於碎石壩下丹水尾閘附近沁水處歲築土壩攔遏
臣今細訪十九渠錯出分流並未全由大丹河歸
沁下游土壩無益應停歲築惟夏秋培碎石壩以
防水勢衝刷其壩底洩水堰密塞以土並將斗門
下小丹河不時查驗遇淺窄疏令與斗門一律俾
丹水暢達衛河以收實效又河南輝縣百泉為衛

河源蘇門山下衆泉湧出滙為巨浸南流里許建
斗門三座中為官渠專資濟運東西民渠分灌田
疇向例重運抵臨清閉民渠俾泉流盡由官渠入
衛五月後民間揀秧需水一日濟運一日灌田按
期啟閉六七月間聽民自便立法甚善永當遵守
章程惟民渠迤東石壩稍坍恐將來閉民渠時泉
水旁洩不盡歸官渠現飭修砌堅實

上嘉之十月疏言今歲運河水小微山湖滾壩磯心應

增設石槽閘板多收水尺餘韓莊以下八閘酌量
啟閉仍挑河底令深江南河清河定河成等閘與
八閘毗連亦可下板其泐口猫兒窩淤淺處逐一
疏濬使運河來路增多明歲重運無虞淺阻

諭曰所議甚善依議行先是

上以清口節宣未暢下河田廬易淹

特命定高堰五壩水誌每高一尺清口即拆展十丈以
次遞展毋惜費三十一年三月疏言清口東西壩工

蓄洩啟閉為黃運二河關鍵仰蒙

欽定水誌臣凜遵籌辦查清口口門年來或留二十丈
或十七丈上年霜降後因湖水大消祇留十四丈
目下挑汎屈節湖水稍大應相機預籌臣與督臣
高晉酌議將東壩先拆六丈連舊口門寬二十丈
俾洪湖及早騰空預留容納之地此後視湖水加
增陸續拆展宣洩

諭獎其留心八月河溢徐州韓家堂宏與高晉分駐兩

壩堵築九月奏言漫水滙入洪澤湖臣等飛飭下
游道廳確查防範據報高堰誌椿僅長水九寸滾
壩並未過水緣本年清口東西壩陸續展寬五十
三丈湖水隨長隨消暢流歸海是以漫水雖滙入
而湖水並未大長此皆由

皇上指授機宜平時大展清口騰空湖面之明效十月
漫口合龍

上以宏等經理盡心歲工迅速交部議敘加一級十一

一奏言徐屬兩岸堤埽各工水漲汕刷處或應補修或應停辦臣分別履勘銅沛廳屬李家樓埽工百六十丈現挺入河心小店埽工四百十三丈宿虹廳屬蔡家樓埽工百七十丈下首現經放淤形勢俱改若仍前歲修徒費無益至各廳塌卸工段勘估鑲修用料較多即以李家樓等三工停修節省之料移辦不至多費再各廳兩岸堤工查驗水痕本年盛漲時有高出水面尺餘者有六寸至八

寸不等者並有水與堤平臨時搶築子堰塘護者
宜量培高厚所用土方銀無多來歲搶修額銷數
內可通融籌辦務使工歸實濟錢量無致虛糜又
言臣回至清口察湖水稍落應乘時接築口門蓄
清抵黃飭道廳等將東西壩陸續接築留口門二
十丈酌量收束均得

旨嘉獎三十二年奏報本年秋汛內黃河北岸蘇家山
南岸毛城鋪二壩水過旋消各工平穩

諭及時疏濬淤積以資宣導三十三年奏言河庫道設於雍正九年額收鹽課河銀夫食等項共六十八萬兩有奇額支河葦等營兵餉堡閘等夫工食並各廳購辦歲搶料物加高土工等項約六十五六萬收支相抵存庫原屬無多近因節存銀兩積八十餘萬加以本年新收支發合計舊存按月造報款項繁多若不定章程恐侵那滋弊請嗣後於每年四月奏銷後河臣就近赴庫盤查一次照司道

例據實保題庶符政體錢糧益昭慎重

詔如所請行尋以王家田頭漫工不能預為籌辦部議
降三級調用奉

旨銷去加三級免其降調三十四年奏言洪澤湖本年
存水甚大 臣將清口東西壩遮展宣洩適黃水驟
長灌入清口 臣隨將惠濟通濟福興三閘下板俾
併力敵黃次日黃水消退清水仍出口會黃東注
三閘之板照舊啟放細查此次水長乃係雨後黃

河客水滙注一時未能相抵並非清水微弱臣惟
凜遵

聖訓留心體察隨時相機料理

上是之三十五年以甄別佐雜人數過多部議降三級
奉

旨從寬留任三十六年五月奏報本年黃河水長甚驟
雖已開毛城鋪峯山閘尚不足殺其勢請啟王家
營減水壩以洩異漲導由鹽河歸海

諭加意防護六月奏搶築各工平穩

上嘉其勤妥交部議敘八月卒

諭曰李宏自簡任總河以來辦理一切修防事宜頗為妥協今年督辦搶築各工不辭勞瘁尤屬奮勉出力茲聞溘逝深為軫恤應得卹典該部察例具奏尋議

宏有從寬留任案照例

賜祭一次子奉翰現任河東河道總督

李本

李本漢軍正藍旗人和碩額駙李淑鰲子乾隆元
年

賜一品廕生十一年分戶部學習授主事累遷兵部郎
中馬館監督二十三年派送軍需戰箭二十萬枝
於甘肅事竣京察一等

召見獎諭二十五年擢四川松茂道二十八年總督開
泰檄赴打箭爐辦理巴塘夷務旋委攝夔州府管
夔渝兩關稅二十九年總督阿爾泰奏本整頓夔

關已有端緒請卸攝夔州府任後仍委管理從之
三十三年俸滿入都適本旗勲舊佐領缺出

命本承襲仍回四川任

諭令會同四川提督董天弼辦理郭羅克夷務三十四
年七月授福建按察使十月調任四川三十六年
九月總督德福委辦兩金川軍務總局尋擢布政
使十一月

命督辦四川奏報郵函事務三十七年正月

諭專司驛站八月辦理曾頭溝一路糧運遲誤部議革

職得

旨從寬留任先是總督阿爾泰婪索屬員及派買物件
短發價值原任川東道託隆發其罪

諭曰李本身任藩司軍需局事務是其本責乃於辦理
夫糧及運送火藥等事種種貽誤且於所派辦差正
印各官不即委員署理至誤地方公事其罪愆已為
不少念其尚屬公過是以仍與姑容與其或思儆戒

改悔今訊出阿爾泰在任聲名狼籍若此豈託隆遠
在川東尚能縷晰指陳李本與之同城共事最久轉
漫無見聞之理李本係藩司大員何竟聽其恣意貪
婪不早據實陳奏似此徇情容隱難以復加寬貸著
革職一併嚴訊定擬總督富勒渾以本罪止折枷不
足蔽辜請留軍營効力贖罪疏入

諭曰李本果係能事之員辦理川省軍需尚可冀其得
力富勒渾何妨另摺奏明朕必俯從所請且可免其

治罪乃該督謂折枷不足蔽辜請留軍營効力贖罪
名為加重實則從寬試問枷號之與効力孰輕孰重
其理顯而易見此等伎倆豈能逃朕洞鑒乎李本之
罪原非必不可宥因富勒渾意在巧為開脫法司亦
不指斥其非朕轉不能予以曲貸非所謂愛之適以
害之耶李本仍著於川省照例折枷俟期滿後再留
軍營自備資斧効力贖罪以示懲儆旋經富勒渾奏
給同知銜在巴朗拉山督催糧運兼稽察要隘三

十九年

賞兵備道銜往南路軍臺辦理諸務并准具摺奏事四
十年授四川驛鹽道四十一年擢甘肅按察使四
十二年河州奸民王伏林以邪教謀為不軌本隨
同總督勒爾謹擒治得

旨嘉獎四十三年授貴州布政使旋護理巡撫是年入
覲奏與雲貴總督李侍堯係屬叔姪

諭不必迴避四十五年七月疏言督撫衙門需用物件

有向外間購買者但身膺重寄事無鉅細悉為羣
吏表率家人長隨例應闕防不得因購取什物出
入至首縣中軍各有職事若令買辦物件不惟易
起逢迎之漸且非整躬率屬之道各衙門原設有
買辦名目在各項人役內僉充此輩雖賢愚不等
而隸名在官約束較易請嗣後督撫衙門購買物
件慎選人役公平購辦倘假托官勢累商病民查
出即從重究處報


聞尋授貴州巡撫十月奏甕安湄潭二縣勸民墾田百五十餘畝遵例六年後起科下部議行四十六年八月因拏獲四川嚙匪二十一名辦理寬縱部議

降調

詔從寬留任十月疏言黔省額運荆楚黑白鉛其威寧州之榨子廠黑鉛自雍正五年開採以來除二成抽課外餘鉛每百觔給價銀一兩五錢每年辦鉛七十萬觔解京供鑄後因出鉛減少與湖南各半

分辦乾隆四十年該廠無鉛可運經部議令楚省
全數承辦自四十年停運截至四十六年僅得課
餘黑鉛百七十九萬餘觔除動支各項及備他省
採買外只存百五十萬觔有零開採年久礦遠硯
深加該處食物昂貴又因餘鉛盡歸官買遂至裹
足不前請照滇省銅務及黔省白鉛例每百觔抽
課二十觔官買四十觔通商四十觔爐丁踴躍黑
鉛可期漸旺得

昔允行四十九年正月卒于侍政由叅領授頭等侍衛
和闐領隊大臣五十九年因病休致



欽定八旗通志卷二百七

欽定四庫全書

史部

欽定八旗通志卷

二百八
九至

欽定四庫全書

欽定八旗通志卷二百八

人物志八十八

大臣傳七十四

漢軍鑲藍旗
劉光弼

李國翰
中朝紀

羅縡
王來用
馬錦

之先
嗣興

海爾圖
尚之孝

段應舉

張德地

桑額

許

李國翰

李國翰漢軍鑲藍旗人父繼學初以商人隨明經

畧揚鎬軍通使我

朝

太祖高皇帝天命六年大兵取遼陽繼學來歸授都司以

副將劉興祚婪索民財劾罷之復屢擒間諜追殺

逃人斂功予三等男爵尋以年老致仕國翰襲父

爵任侍衛

賜號墨爾根

太宗文皇帝天聰三年從征明北京還攻永平先衆步戰

有斬獲五年圍大凌河城內兵突出國翰率兵戰

却之旋攻克一臺又擊敗明兵之自錦州赴援者
九月考察所管人戶以善於拊循晉二等男崇德
三年七月任刑部理事官十月隨貝勒岳託征明
於邊外發敵所藏火藥數處比入邊過敵千餘人
據山列陣國翰率兵奮擊敗敵獲馬四十進克墻
子嶺轉戰至山東克濟南府城師還攻望都獲鹿
二城並以礮擊毀其垣四年授鑲藍旗漢軍副都
統五年隨睿親王多爾袞圍錦州攻克呂洪山臺

擊敗山口步兵敵兵自松山遁入高橋迤南三臺
國翰偕衆攻克之斬百餘級生擒副將王希賢叅
將崔定國等七年明總督洪承疇就擒總兵祖大
壽以錦州降移師攻克塔山杏山國翰並在事有
功晉一等男加一雲騎尉是年擢鑲藍旗漢軍都
統八年隨鄭親王濟爾哈朗取明前屯衛中後所
二城敘功晉爵三等子順治元年五月大兵既擊
敗流賊李自成定燕京國翰同都統劉之源祖澤

潤率兵勦滅饒陽土賊康文斗郭壯畿等進征山
西時李自成遁陝西其黨猶分據太原平陽等府
國翰同都統葉臣合兵攻克太原復分勦賊衆於
汾西縣山西既平凱旋

賚白金五百兩尋隨英親王阿濟格征陝西屢敗賊衆自
成遁湖廣移師追勦敗賊應山縣進征武昌同都
統金礪奪賊船數百二年十一月

命同都統巴顏率兵征四川甫至西安值叛鎮賀珍自漢

中糾賊黨孫守法等來犯國翰與駐防西安內大臣和洛輝期師兩路夾擊斬級無算三年三月肅親王豪格統師至西安遣國翰同巴顏搜勦延安餘賊追至張果老崖掘壕困之乘夜攻克其寨殲賊渠獲馬二百餘遂隨肅親王征四川滅流賊張獻忠復率兵渡涪江擊敗偽總兵袁韜五年四月命為定西將軍同平西王吳三桂鎮漢中六年偽王朱森釜偽侯趙榮貴糾眾萬餘犯階州國翰先眾趨擊

陣斬森釜榮貴尋擊敗偽將軍王永強斬級數千
獲駝馬數百復宜君同官蒲城宜川安塞清澗等

縣

上深嘉其勇畧並

諭以自後但發縱指示不必身先士卒時叛鎮姜瓖據大
同其黨劉登樓張鳳翼任一貴謝汝德萬鍊等分
據城邑國翰遣兵會勦殲賊甚衆招撫河東諸處
攻復府谷縣擒斬偽經畧高有才及偽官三百餘

人招降偽總兵郝自德等先是張獻忠既滅其黨
孫可望劉文秀白文選李定國等竄遁既而降附
明桂王朱由榔與其所設官屬並據川東川南九
年國翰同三桂督兵攻復成都嘉定擒斬其總兵
李廷明林時泰龍名揚等文秀文選皆敗走別遣
將分徇重慶敘州皆下之其守將王復臣等糾裸
羅列象陣合衆五萬犯保寧薄城下國翰自綿州
聞急趨援率兵奮擊斬復臣及賊衆萬餘捷

聞

頒賜紫貂冠服鍍金甲冑橐鞬等物及鞍馬

勅部優敘初國翰以征勦自成獻忠兩敘功復兩遇

恩詔洊晉一等伯至是晉三等侯可望懲保寧之敗與定

國併力犯湖廣不復窺四川國翰奉

詔同三桂還鎮漢中而偽侯譚文譚洪譚詣與自成遺黨

劉二虎等聯結為寇尋復陷重慶使偽都督杜子

香據之十五年三月國翰同三桂進征由南部西

充至合州杜子香率衆迎戰敗遁遂復重慶以總
兵嚴自明率所部留鎮而自與三桂進桐梓偽總
兵王友臣迎降遂趨遵義偽將軍劉正國據險隘
拒戰我師擊之潰由水西遁入雲南遂取遵義及
所屬州縣五月進擊偽將軍楊武偽總兵梁亦英
等於開州斬級千餘獲其象馬器械開州及附近
城邑俱降水西土司安坤等並歸順時寧南大將
軍宗室洛託與經畧洪承疇已取貴陽國翰與三

桂奉

詔侯信郡王多尼征南將軍卓卜特兩路兵並進雲南乃
還駐遵義七年疾卒喪至京

命內大臣致奠贈太子太保

賜祭葬如典禮謚敏壯長子海爾圖襲爵與第三子桑額
俱別有傳

世宗憲皇帝時以國輸入祀賢良祠其侯爵既襲三次循
例改襲三等伯

今上乾隆十五年加伯號曰懋烈

羅繡錦 弟繪錦

羅繡錦遼陽人後隸鑲藍旗漢軍

太宗文皇帝天聰五年始設六部繡錦由諸生授工部啟

心郎八年

命禮部試滿洲漢人通文義者為舉人繡錦與選

賜衣一襲免四丁尋授國史院學士纂修

太祖高皇帝實錄書成得

優賚崇德七年兼授佐領順治元年七月擢河南巡撫時
流賊李自成羽黨有衆二萬寇掠衛輝懷慶間而
原武新鄉諸邑復有土賊為患繡錦同總兵祖可
法協力防勦並請

敕發八旗勁旅會豫親王多鐸統師征陝西

上命取道河南相機勦賊諸賊或降或遁繡錦疏請以河
北荒地九萬餘畝令守兵屯種得

旨俞允二年十一月擢湖廣四川總督時湖南郡邑為明

巡撫何騰蛟等所據自成遺黨一隻虎劉二虎等復寇擾湖北繡錦至荊州一隻虎率衆犯城順承郡王勒克德渾自江寧移師擊走之及順承郡王班師賊復窺犯繡錦飭兵防勦屢奏捷土賊胡公緒據天門縣之八百洲糾黨四出焚掠殺署鹽道周世慶繡錦遣中軍副將唐國臣署總兵楊文富分路進勦陣擒公緒平毀賊巢四年恭順王孔有德征湖南取長沙衡州寶慶辰州等府繡錦條奏

增設鎮協移兵駐守事宜並下部議行先是襄陽
總兵王光恩與鄖襄道李之綱互訐賍私下撫按
會核光恩獲罪逮問其弟光泰遂糾衆作亂據鄖
陽提督孫定遼戰歿

上遣侍郎喀喀穆率師自河南進勦繡錦以兵會之復鄖
陽光泰遁四川五年喀喀穆將班師值江西總兵
金聲桓叛湖南騷動常德武岡辰州沅州復為郝
搖旂馬進忠所陷繡錦奏留喀喀穆駐守荊州而

分遣總兵徐勇馬蛟麟防守要地屢敗賊衆

上復命鄭親王濟爾哈朗統師征湖南諸隘賊郡邑以次
恢復繡錦疏言湖南叛服不常大兵凱旋之後恐
餘孽跳梁煽誘降將如故凡勢窮乞降之衆宜安
挿腹地以靖疆圉

上嘉納其言九年七月卒於官年六十有三

賜祭葬如例贈兵部尚書廕一子入監弟繪錦順治八年

授通政司理事官十三年擢順天府府尹十八年

遷貴州巡撫康熙四年繪錦以定例荒地招民開墾三年後起科復經戶部定議各省荒地限兩年墾徧過期遣官履勘因疏言黔省雖開闢數年而連年逆苗倡亂征剿頻仍不能不藉用民力又復疊遇水災已熟之田輒多荒棄未墾之地尚事招徠通計各府衛新墾之地有一萬二千九百餘畝應照例起科此外請酌寬年限並暫停遣官履勘疏下部從之六年十一月以年老乞休後卒於家

劉光弼

劉光弼遼陽人初冒姓曹後復劉姓隸鑲藍旗漢

軍

太宗文皇帝天聰五年任耀州城守尉率兵從

上征明圍大凌河城攻克近城三臺城內兵突出光弼先

衆馳擊斬一人我兵有陷陣者力援出之明監軍

道張春總兵吳襄等由錦州來犯光弼衝入敵陣

斬其裨將崇德五年任參領隨大軍圍明錦州同

侍衛李國翰等攻克呂洪山諸臺屢擊敗松山杏
山馬步兵敵以兵據山口阻我師光弼同國翰率
兵奮戰敵皆敗遁錦州既下復以礮攻克塔山杏
山兩城及附近臺堡敘功予騎都尉世職七年六
月擢鑲藍旗漢軍副都統八年同都統劉之源赴
錦州督鑄紅衣礮尋隨鄭親王濟爾哈朗征明寧
遠取前屯衛中後所二城敘功加雲騎尉世職順
治元年隨大軍入山海關擊敗流賊李自成旋同

都統葉臣等征山西攻克太原城三年隨端重親
王博洛征浙江拔金華進定福建乃還京五年授
禮部侍郎尋隨征南大將軍譚泰討江西叛鎮金
聲桓復南昌府譚泰奏以光弼署江西提督事六
年平廣昌縣山賊招降偽官三十餘員旋得

旨實授提督時山賊張自盛洪國玉等據湖東剽掠光弼
遣叅將陳陞等往勦斬獲無算偽總兵董明魁郭
承旻等率眾降七年八年三遇

恩詔晉世職至一等輕車都尉十三年

詔獎力捍巖疆著有勞績諸臣

賜鞍馬弓矢等物以示優異光弼與馬十六年以老病致

仕康熙十二年卒

予祭葬如例子顯祿襲職

申朝紀

申朝紀遼東人後隸鑲藍旗漢軍

太宗文皇帝天聰八年任刑部啟心郎崇德元年

賜內院學士六部啟心郎以下諸臣人戶牲畜分四等朝
紀得二等

優賜順治元年七月授河南河北道駐懷慶值流賊李自成之黨二萬餘來犯朝紀登城守衛晝夜不懈有賊渠乘白馬薄壕麾衆犯城者朝紀舉礮殪之賊黨悉驚竄二年七月擢江南布政使十一月擢山西巡撫三年疏言驛遞之累民始自明季之計糧養馬按畝役夫臣莅任後禁革驛遞濫應里甲私

派雖積習已除恐踰時復蹈前轍請

旨嚴飭勒石各驛永遠遵守又言闔省驛站銀舊額一十五萬有奇明季疊經裁減撥充兵餉于是驛費不足輒私派於民近蒙

皇上軫恤民力經制次第釐定請

勅部盡復原額庶驛費裕而私派永除又請定賦役全書凡應裁應留俱覈實詳酌俾有司不得私徵濫派疏並下部議行四年四月陽城土賊王希堯賈國

昌以邪教倡亂朝紀遣中軍都司白璧同冀南道
武延祚率兵往勦希堯國昌俱伏誅五月汾州營
叛兵李本清任自興等糾衆劫掠據永寧銅柱寨
朝紀赴汾州指揮調度遣冀寧道王昌齡督兵同
叅將張國纓遊擊高國盛等進攻賊寨發鎗礮殲
賊無算擒李本清任自興獲馬羸弓箭等物焚其
寨六月鄉寧縣逆民楊春暢等復以左道聚衆據
冷泉寨洞朝紀遣平陽營副將范承宗勦平之七

月擢宣大山西總督五年三月卒於任祀山西名
宦祠

王來用

王來用漢軍鑲藍旗人天聰八年

太宗文皇帝命禮部考取通滿漢蒙古文義者為舉人來
用以漢書中式崇德元年授工部啓心郎八年兼
叅領順治元年授保定兵備道二年擢山西布政
使三年三月大兵屯四川勦流寇張獻忠餘孽

詔授來用戶部右侍郎總督山西川陝糧餉駐西安六月
疏言川陝賦役未定錢糧無從核對請

敕部詳開實數以杜吏胥妄報弊七月又言道府州縣責
在催徵應以完十分為上等七八分為中等三五
分為下等歲終察核實罰庶知警惕八月又言陝
西被兵州縣地荒人少糧欠難追請蠲荒徵熟又
山西舊銅日少鼓鑄日增定價過賤商販裹足請
酌加均下部議行四年奏稱漢南遭賊賀珍蹂躪

荒殘已極請加

恩賑濟並

敕部儲備肅親王凱還兵餉五年閏四月秦稱叛回倡亂
河西運道阻塞進征雲貴大兵指日入秦請撥楚
漕協濟八月又言漢中駐大兵錢糧歲不下數十
萬請專設餉司以專責成疏入俱如所請六年疏
言出征兵丁例得家口養贍錢糧司兵者欲於離
伍日算支司餉者欲於到軍日扣起又同時出兵

有直至軍前或中途留駐不同請定例畫一銷算
部議兵丁調後不論已未到俱應給家口養贍中
途逃亡不得冒支得

旨允行八年四月御史聶玠劾來用專倚中軍王楨自隲
職業部議降一級用援

赦免七月裁督餉總督入京另補九年授順天巡撫十年
閏六月疏言山海永平距百五十里有永平道協
中馭應裁山海道協止留遊擊三屯遵化距五十

里有三屯協副將可兼攝臣又駐遵化應裁遵化
協副將止留遊擊計裁兵千一百名馬蘭松棚喜
峯太平四路守備僻冗亦應裁其兵無幾歸各汛
分轄衝要如薊城駐餉司薊屬開平衛俱宜增兵
二百拱華城宜設守備增兵百五十拱極城宜設
都司增兵二百俱於裁數內撥補餘員歸部另選
兵令歸農得

旨具見用心料理下部議從之十二月移巡撫駐河間府

奏言撫標兩營隨臣移駐請撤回城內舊設滿兵
或調要處用尋議調滿兵駐德州十一年

命各督撫確議衛所裁併之處來用奏裁興州後屯衛歸
通州左衛大同衛歸河間衛茂山衛歸保定左衛
紫荆所歸保定右衛武定所無衛可併應歸武定
州從之時定南王孔有德櫬歸京師

詔近畿地方官迎通州官不至

敕督撫查叅來用以叅奏遲降署湖廣按察使十四年改

補河南大梁道尋卒

馬之先

馬之先遼東金州衛人隸漢軍鑲藍旗由生員任
昌平州知州順治二年遷山西太原府知府三年
遷河東道四年授湖廣按察使七年三月遷布政
使七月擢陝西巡撫時積寇王才據終南山肆劫
之先既抵任遣遊擊陳明順等由子午鎮進剿賊
退走高關峪追擊敗之又敗之化羊峪擒才斬獲

無算會河南賊何柴山潰走陝西入土賊程福亮
營之先招降福亮擒柴山又剿賊孫守金唐珍玉
等餘寇悉平十一年五月湖廣賊渠劉二虎郝搖
旂等劫陝西麥之先偕漢興總兵趙光瑞調兵三
路迎擊賊敗入竹山據小廣峪寨我兵合圍奮剿
覆其巢陣斬偽總兵傅奇十月遷宣大總督題改
陽和府仍為陽和衛修大同府城如制十三年五
月疏言大同民貿易專用錢故徵糧銀錢兼收成

規已久若遵部文盡徵銀於民不便請酌徵錢配
兵餉部議從之尋調川陝總督

命加兵部尚書銜六月

陞見

賜冠服鞍馬

諭曰爾以素望堪任斯職故行特簡爾受事後務實心供
職興利除害陝西乃天下咽喉要地爾須較前任總督
孟喬芳倍加勤慎方克有濟毋使天下謂朕不知人也

九月疏報流賊張獻忠餘黨冉秉乾等投誠請照
例安置報

聞十四年卒

諭曰馬之先久歷巖疆勞瘁殞身深可憫惻應得卹典著
察例具奏尋

賜祭葬如例謚勤僖

海爾圖

海爾圖漢軍鑲藍旗人三等侯李國翰長子順治

三年隨大軍至西安擊敗叛賊賀珍孫守法劉體
純等進征四川又擊敗偽侯袁韜等五年授兵部
理事官尋任叅領七年擢鑲藍旗漢軍副都統九
年遇

恩詔予騎都尉世職十一年三月任戶部右侍郎十一月
轉左侍郎時明桂王朱由榔將李定國由廣西犯
廣東海爾圖隨征南將軍珠瑪喇率師往剿敗定
國於新會所陷州縣以次規復敘功晉世職為三

等輕車都尉兼一雲騎尉十三年二月以員外郎
朱世德司權河西務虧缺稅銀戶部誤援

恩赦議免部臣俱坐降革海爾圖罷侍郎任專管副都統
事降世職為騎都尉十六年遷本旗漢軍都統康
熙元年襲父三等侯爵以騎都尉職予其弟諾邁
襲十四年定西將軍貝勒洞鄂征叛鎮王輔臣圍
秦州海爾圖奉

命運紅衣礮至軍前並叅贊軍務既至西安疏言臣抵西

安聞自荊州來之兵及貝勒催辦弓矢之護衛俱
為賊阻暫駐隴州仙逸關等處若不滅此賊恐紅
衣礮不能前進乞添發滿洲兵二千剿賊奪關以
通道路

諭曰秦州需礮甚急若俟發京兵恐稽時日今都統海爾
圖總督周有德叅領達爾泰等兵統計已足二千其即
合軍平賊速運紅衣礮往秦州尋復

諭曰欲平陝西諸寇必先取秦州欲取秦州必須大礮今

海爾圖等率兵護送紅衣礮與賊相持於仙逸關恐諸將各自將兵互相推諉致誤軍機其令周有德海爾圖為統領前赴貝勒軍會仙逸關賊遁秦州偽總兵陳萬策等降於貝勒洞鄂軍洞鄂進征平涼奏令海爾圖運礮至平涼海爾圖具啟洞鄂以運礮屯夫多逃遁請發鎗手步軍四百棉甲兵八百防護又以礮手熟練者少請於八旗滿洲漢軍內擇素習者遣發赴軍洞鄂以奏得

旨貝勒洞鄂等帥兵抵平涼為日已久不速滅賊平定地方及命其用礮攻平涼海爾圖又託故具啟遷延時日洞鄂等並不議可行與否但據啟以奏殊為不合前送紅衣礮已撥漢軍每佐領二名海爾圖謂為不足因添撥一名及海爾圖去時藉口沿途養馬不即速行至關山又請兵二千欲靖賊寇復如所請添發而究不能開通關山今令用紅衣礮急取平涼海爾圖請自京師發鎗手棉甲耽延時日有誤軍機殊負任使着解叅贊之任

十八年大軍進征四川撫遠大將軍圖海疏請以
海爾圖駐守鳳翔十九年

詔海爾圖率自京發往四川之漢軍千人隨大軍進征雲
貴二十年四月卒於軍

賜祭葬如例孫李廷燮襲爵

段應舉

段應舉遼陽人父思信初為明廣寧千總

太祖高皇帝天命七年大兵取廣寧思信投誠予騎都尉

世職隸鑲藍旗漢軍及卒應舉襲職順治六年署
叅領隨端重親王博洛討叛鎮姜瓖攻汾州及太
谷縣皆以紅衣破克其城師還授叅領兼戶部理
事官兩遇

恩詔晉世職二等輕車都尉十年隨貝勒屯齊征湖南時
明桂王朱由榔將李定國馮雙禮等據寶慶之周
家坡以抗我軍孫可望亦率衆來犯應舉同叅領
高鳴鐘等奮擊敗賊十七年擢鑲藍旗漢軍副都

統十八年

聖祖仁皇帝御極命同鎮海將軍王國光赴廣東駐防潮
州康熙三年剿碣石叛鎮蘇利賊衆萬餘於南塘
鋪據險抗拒應舉同護軍統領尚竒功等分左右
夾擊賊敗遁復碣石衛城敘功晉世職一等輕車
都尉十二年署山東提督十三年六月

命率京口駐防兵三千江南提標兵二千赴杭州剿禦逆
藩耿精忠至則擊敗賊衆於嵯縣七月授福建提

督十四年擊賊僊居黃巖太平樂清進圍温州皆
奏捷十五年隨康親王傑書進征福建耿精忠降
時海賊鄭錦據漳泉興化十六年應舉同將軍拉
哈達合兵進剿擊敗賊衆招降仙遊惠安等縣攻
復興化泉州二城復分兵定漳州府及海澄等縣
十六年應舉由漳州進駐海澄賊復掠南安同安
應舉屢遣兵擊卻之十七年三月賊將劉國軒吳
淑等寇臨平和縣副都統穆赫林同海澄公黃芳

世擊賊於灣腰樹戰失利還保海澄芳世旋疾卒

五月

上切責應舉不能速平海賊調江寧提督楊捷代之

命應舉仍以副都統從征是月賊衆併力犯海澄據高阜

瞰城中礮石交下應舉同穆赫林協力固守糧盡

外援不至六月己卯城陷應舉與穆赫林並自經

死子牧臣襲世職

世宗憲皇帝時以應舉與穆赫林並入祀昭忠祠

張德地

張德地漢軍鑲藍旗人原名劉格康熙七年奏改
今名初以通曉

國書在戶部學習順治九年授宗人府主事遷啟心
郎十五年遷太常寺少卿十七年遷太常寺卿十
八年遷兵部督捕理事官康熙元年擢順天府府
尹二年授四川巡撫五年疏言夔州為水陸通衢
請於雲陽巫山等處各設水站從之七年疏言四

川自張獻忠亂後民少地荒請不拘省分凡無恒
產傭工游食之人地方官查報即酌給盤費招徠
安置文武官量予激勸招民百家以上墾田十頃
以上者分別紀敘陞轉則爭先招墾川省可冀富
庶下部議行八年以捐賑修城議敘加工部侍郎
銜九年五月以捐貲招回川民六百七十四戶安
置得所議敘加工部尚書銜八月疏言康熙六年
奉

旨裁各省道廳以汰冗員但蜀居天末幅幘遼濶擇其最
要者懇復四員以資管轄

諭曰據張德地奏稱沿邊番夷苗獮雜處道員必不可裁
其各省亦曾題請存留道員或有裨益於地方邊疆著
議政王大臣九卿科道議奏尋議如所請行十年四月
武生劉瑄等許德地於康熙八年武闈賄賣武舉

命副都御史阿範等往審以德地科場作弊擬斬援
赦免死革職永不敘用十二年七月德地叩

閻稱寬

詔下部另議尋議德地科場受賄無實據前議太過應復
職十三年二月復授四川巡撫時逆藩吳三桂叛
七月偽總兵彭時亨等率衆三千餘犯廣元德地
偕四川總督周有德親禦之十一月陝西總督哈
占以蜀中水陸阻賊糧運難繼入奏

命德地同大將軍洞鄂撤保寧兵回廣元廣元兵回漢中
守陽平等處勦除寧羌諸賊十四年逆鎮王輔臣

叛蘭州陷

命洞鄂等進勦留德地協守西安等處尋興安兵變又

命德地赴延安固守遏賊衝十七年正月兵部追敘廣元

勦賊功

諭曰周有德張德地等前在廣元時將供應大兵糧米不能運送接濟伊等徒然坐食糜費不過擊退來犯之賊並無大創功績又接駐大兵後並無効力之處著大將軍圖海叅贊各官會同嚴察議奏先是廣元之役周有

德劾奏德地棄城敗遁請革職

命大將軍圖海質詢定擬具奏至是德地以平逆要畧三

事陳奏得

旨張德地廣元敗遁貽誤地方及令守延安乃行推諉今
又自行巧卸虛誑妄奏殊為可惡著吏部嚴察議奏部
議革職提拏嚴審得

旨張德地著革職免其提拏二十二年楚民胡朝勲許世
杰等以德地局霸部民為僕勒寫身契控部經部

訊德地巡撫四川時借招民為由將胡朝勳等招到四川即以所給路費作身價發知府冀應熊勒寫文契藩司劉顯貴用印屬實應議罪因事在

赦前免議得

旨依議尋卒

桑額

桑額漢軍鑲藍旗人三等侯李國翰第三子由護衛遷叅領康熙三年授寧夏總兵十二年九月擢

雲南提督未抵任值逆藩吳三桂反留駐荊州十三年正月改湖廣提督二月賊將夏國相犯澧州秦額率兵赴援戰失利還荊州三月賊將吳應麒陷岳州順承郡王勒爾錦統師駐荊州令秦額移守武昌七月隨貝勒察尼規復岳州由城陵磯進剿以礮擊沉賊船大敗賊衆于七里山下十五年二月敏功加右都督十七年七月賊由洞庭湖乘風出犯秦額率副將胡世英遊擊鄭文魁等奮戰

卻之追至岳州城下九月賊船數十聚癩子山下
桑額同前鋒統領杭奇合兵攻擊發矢石鎗礮殪
賊百餘獲賊船四明年正月岳州賊遁桑額收復
華容石首安鄉等縣敕功晉左都督

詔趣大兵滅賊收疆仍授桑額雲南提督桑額奏改彝陵
鎮標兵為湖廣提標以舊所屬兵為雲南提標率
之進征十九年三月同總兵陳珀游擊李珵等攻
克辰龍關復辰州沅州進征鎮遠平越貴陽安順

及永寧州屢敗賊兵遂趨雞公背鐵索橋賊聞風
震懾焚橋而遁桑額乃督土司沙起龍等築浮橋
以濟師二十年二月隨大將軍貝子彰泰圍雲南
省城同總兵白成功王仕華等屢敗迎戰賊衆逆
孽吳世璠窮蹙其賊帥馬寶胡國柱俱自四川還
救桑額率兵勦賊楚雄馬寶據烏木山列陣副都
統託岱由中梁進攻營總幹都海由右梁進攻桑
額領精銳趨左併力衝擊賊衆潰遁窮追五十里

馬寶越山遁赴大將軍賚塔營乞降與逆黨方光琛等並磔死桑額同都統希佛搜剿胡國柱於永昌截守潞江諸要隘國柱度不能脫自縊死其黨皆降雲南平初桑額赴援澧州退還部議應革職及進征雲南奏標下兵逃散三百餘

上命左都御史哲爾肯赴武昌察審覆奏標兵因家口在武昌無資養贍逃回者千餘人

上切責桑額不恤士卒下部嚴議應革職並得

旨留任戴罪圖功至是敕功復原職二十一年五月乞休
詔慰留之二十五年三月卒於官子李楠由佐領洊陟鑲
藍旗漢軍副都統見大臣表

許嗣興

許嗣興原名嗣印漢軍鑲藍旗人父得功明副將
順治元年投誠授三等男兼世管佐領官至雲南
提督康熙十五年卒

賜祭葬其孫國相襲嗣興于康熙十一年由兵部督捕筆

帖式授山西蒲州知州十五年丁父憂服闋補山西忻州知州內遷刑部員外郎轉工部郎中尋授四川夔州府知府二十九年擢陝西洮岷道三十年八月岷州同知年昌齡首告嗣興斥辱屬員勒索金銀馬匹諸劣跡巡撫伊圖劾奏

命革職三十四年捐復三十八年補湖廣下荆南道四十年遷廣東按察使四十三年擢河南布政使四十五年十二月因廣東按察使任內承審不實部

議降一級調用巡撫汪灝以嗣興于地方利弊民生休戚能實心經理疏請降留得

旨俞允四十八年十一月擢福建巡撫四十九年閏七月

泉州漳州福州興化四府及福寧州被旱嗣興疏
報遲延

諭曰督撫係封疆大吏水旱情形自應及時奏報漳泉等處五六月旱災督撫並未據實上聞至閏七月得雨後始行具奏殊屬溺職著嚴飭行嗣興尋疏請本年福興

泉漳四府福寧一州所屬未完地丁銀緩徵並將
各屬積穀發糶但賦既緩徵各鎮營餉不敷請於
隣省撥協銀三十萬兩八月又疏言閩省額賦歲
內完不過五六分至歲外奏銷究不過九分必不
能照奏撥之數完解賦少餉繁請再撥隣省協餉
銀三十萬兩並請凡遇大撥兵餉將本年起解地
丁銀祇撥一半其半候撥次年兵餉庶不致遲悞
俱下部議行先是嗣興任河南布政使時巡撫汪

灑疏叅歸德府知府郎鍾貪婪革職至是鍾以被
誣叩閣

命侍郎張世爵往審尋審得郎鍾因公科斂牙稅失察衙
役犯贓屬實並無入已贓灑以貪婪糾叅過為巧
飾應降三級嗣興及按察使高啟桂原揭過當應
罰俸一年又豫省各州縣牙稅年額解司庫七千
五百餘兩實盈餘銀萬七千餘兩灑及嗣興久任
撫藩明知此項盈餘不查出作正自四十五年至

四十八年計銀六萬八千二百五十兩有奇除題
明災除外餘令二人分賠事下部議灑應賠三萬
兩嗣興應賠一萬兩得

旨許嗣興年已衰邁且於此案有應賠銀兩著革任五十
九年卒雍正二年子國桂為宣化總兵疏請

予卹

賜祭葬如例蒲人公請崇祀名宦祠國桂初由佐領授叅
領康熙二十九年從征噶爾丹於烏蘭布通中火

器傷得功牌一尋授副將累遷浙江黃巖總兵江
南京口副都統五十六年補漢軍正黃旗副都統
五十九年大軍定西藏國桂領礮隨征凱旋敘功
給雲騎尉世職雍正元年授宣化總兵三年遷漢
軍正紅旗副都統四年以原任總兵時奉

旨恩免兵丁應賠駝載馬匹兵丁私立碑為國桂頌德後
任總兵黃廷桂劾之部議革職擬斬監候尋病歿
其雲騎尉世職停襲

尚之孝

尚之孝漢軍鑲藍旗人尚可喜次子幼隨父於鎮所康熙十三年任藩下都統值逆藩吳三桂耿精忠反潮州總兵劉進忠叛應之可喜令之孝率兵討進忠先是可喜欲以長子之信襲其平南王爵至是惡之信醢酒嗜殺因疏陳之孝律已端慎馭下寬厚堪嗣職

聖祖仁皇帝命之孝襲封平南王之孝畏之信啟巡撫劉

秉權為之奏辭部議令可喜如舊理事俟賊平以
之孝襲時普寧為進忠黨劉斌所據知縣段添佯
附賊潛遣人請兵約為內應之孝誘斌出城迎戰
添閉門絕賊我兵奮擊敗賊斌竄走之孝復普寧
進征潮州進忠糾眾抗拒我兵三戰皆捷陣斬偽
副將陳璉及賊兵千餘又攻克東津筆架山洗馬
橋賊營十四年

詔授之孝平南大將軍之孝圍潮州歲餘進忠求援於海

賊鄭錦錦遣偽總兵劉國軒引賊萬餘助進忠我
兵戰失利之孝退駐惠州十五年可喜以疾劇入

奏

上命之孝還廣州視疾代理藩務之孝未聞

命之信已降三桂脅之孝撤兵棄惠州之孝弗能抗解兵
柄侍可喜疾及可喜卒仍間居廣州十六年之信
歸順襲父爵之孝還京

命列內大臣之孝疏言臣詣

闕待罪分當誅戮乃蒙

恩寬宥願募兵三千備軍械勦賊自効廷議如所請俟募
兵數足分為三營設將校給以俸餉赴簡親王喇
布軍供調遣于是

詔授之孝宣義將軍十七年之孝率兵至江西時三桂餘
黨猶分據吉安贛州山寨之孝與總兵許盛會師
進勦多斬獲十八年招降偽總兵林興隆偽副將
王國贊等二十餘員兵六千餘偽將軍楊一豹江

機由廣信寇掠建寧邵武之孝奉

詔赴福建會勦師至汀州一豹等降於康親王傑書軍之

孝還江西十九年江西平

命之孝還京以所募兵留充江西綠旗營伍是年九月之

信以悖逆

賜死廣州法司議之孝應連坐

詔免之仍隨內大臣班入直二十年五月請迎其父骸骨

於廣州歸葬海城得

旨俞允二十二年議政大臣等追論之孝當之信叛時不能討賊邇者藉詞葬父久留海城又奏請欲守

陵寢計圖晏逸請革職銜與其子弟並籍入內務府

詔從寬止削其職三十五年正月卒年五十有七子崇坦

官至鑲紅旗漢軍副都統

欽定八旗通志卷二百八